

KIRBEPREDIGT 1995

Seid willkommen liebe Leut
ond nemmet Euch für ons g'schwend Zeit.
Bleibet do, ihr werdet seha,
en oim Jahr ischd recht viel gscheha.
A viertel Stond ond s' isch erledigt,
dier 95er Kirbepredigt.
Horchet zua ond seid net baff,
dorüber was passiert em Kaff.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Kaum send d' Gmeinderät em Amt,
hat d' Verwaltung scheint's recht gschlampt.
D' Presse hat es glei berichtet,
auf Vergleiche ne verzichtet.
Mit „Sizilien“ ond „Mafia-Methoda“
hend se sich gegaseitig überbota.
D' Gmeinderät sprechet von Tricks,
dr Bürgermeister weiß von nix.
Sei Stellvertreter stetig schweigt,
hend die irgendwas vergeigt?
En dr Krautlose stand uff jeden Falle
beim Breckle zmol a neue Halle.
Viele hend es zwar beschönigt,
doch des Deng war net genehmigt.
Dr Schulteß „hüb oifach nix gsäh“,
erst als die Halle fertig gwä,
„häbet se nach einer Weile,
entschieda dann en aller Eile“,
dass der Bau so rechtens isch.
Em kleina Ma kommts's vor wie List.
Für jeden Mist braucht er en Stempel,
ond do goht's grad zua wie beum Hempel.

**Jo net ärgera, d' Stirn net runzla,
drüber lacha, oifach schmunzla.**

**Für ons zählt die paar Tage einzig,
Chor: onser Kirbe '95.**

Sonst gibt's koine Bauskandale,
ond koi Gmeinderatsrandale.
D' Gemeinekassa ischd recht leer,
do fällt s' Geld ausgeba schwer.
D' Gemeinde ka halt net viel baua,
aber au net viel versaua.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Was lange währt wird endlich guat,
wenn mr lang gnuag warta duat.
Nach Planung, Klagen, Widerspruch,
kam jetzt dr erste Spatastich.
Neba de Kendergarta-Kender,
für's Evangelisch Gmeindecenter.
Mit de Nochbor johrelang beharkt,
ko dr Rest jetzt uff dr Markt.
A Kaufland wird's zwar net ganz geba,
doch Läden, Wohnung und daneba,
Parkplätz, Café und Büro,
soll stimma dr Verbraucher froh.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Wenn a Kanalrohr nemme will,
ischd ihm irgendebbes zviel.
Vielleicht isch's scho ziemlich alt,
ond deswega bricht's dann bald.
Oder s' kommt ihm z'viel Gewässer,
durch sein schmala Rohrdurchmesser.

So war's au beim Metzger Geiss,
vorrissa hat's dr ganze Scheiß.
Kurz druff en dr S-Bahn-Unterführung,
kam d' Stroß au mit Wasser en Berührung.
D' Kanaldeckel send recht ghupft,
dr Rega der hat d' Fahrbahn glupft.
Jedenfalls en beide Fälle,
hat mr dann en aller Schnelle,
einseitig die Fahrbahn gsperrt,
denn mr hat dann mit Bedacht,
Rohr ond Stroßa wieder gmacht.
En verschiedene Bau-Epocha –
dauert hend die mehrere Wocha.

***Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.***

Doch es gab au eine Zeit,
mr sollt's net glauba liabe Leut.
Wo's mit Verkehrslärm war vorbei,
s' hätt könna fast a Kurort sei.
„Bad Benninga“ ganz ohne Quella,
mir hend's fast net glauba wella.
Besinnlich war's wia zwanzig Johr zurück,
als gsperrt war onser Neckorbrück.
Mitta em Ort do kanntsich flaniera,
während se waret am saniera.
Doch die Ruhe musstest büßa,
wenn d' mol haschd nach Marbach müssa.
Om sich einem Omweg z'spara,
send viele mit dr S-Bahn gfahra.
A gsperrte Brück – guck no Herr Specht –
ischd alles in allem gar net schlecht.
Eigentlich ischd es klar ond logisch:
sie wirkt zwangsläufig ökologisch.
Wenn s' Autofahra fällt so schwer,
benutzt dr Zug mr oifach mehr.
Milliona für Umgehungsstroßa spara,
oifach d' Brück zua, s' wird nemma gfahra.
Wenn a Verwaltung so klug handelt,
no wird au d' Gegend net verschandelt.

***Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.***

Doch jetzt zom nächsta, jeder kennt's,
ganz oba doba, s' Autohaus Lenz.
Ob Corsa, Vectra, Fahrradsport,
des ganze hat en neua Hort.
Für alles was dort tankt ond opelt,
wurd's Autohaus jetzt fast verdoppelt.
Damit des Kunden Herze lacht,
hend se au alles schöner gmacht.
De Leut em Ort wurd präsentiert,
wofür die Lenz hend investiert.
Zom Glück isch Winkle nebadro,
sonst käm a Werk von Opel no.
No letztes Jahr kurz vor dr Kirbe,
war d' TSV-Halle recht mürbe.
Doch dr Verei hat investiert,
ond d' Halle die isch jetzt saniert.
Der Umbau wurde guat gestaltet,
außer dr Dusch isch nix veraltet.
Für Handball isch's no emmer z' eng,
drom machet die ihr eigens Deng.
Hend sich mit Freiberg zsmagschlossa,
ond d' Siebameter dort verschossa.
Aber oin groða Vorteil hat's,
dort hend se halt zom Spiela Platz.

***Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.***

De Kicker isch dr Platz net z'klei,
für manche scheint er z'groß zu sei.
Beim Jubiläum hend se sich no achtbar gschlaga,
gega d' Kickers war a 0:4 zu ertragen.
Doch jetzt en dr Meisterschaft
verlässt se sichtlich Saft ond Kraft.
Es fehlt au deutlich spielerisch
6 Punkte bloß vom grüna Tisch.
Sogar em Vordermaier isch des z' viel,
den siehsch bei fast koim onziga Spiel.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

A Attraktion isch's allemal,
dr Benninger Fuaßball-Fleckapokal.
Send zwar keine Elitekicker,
ond au dr Bauch scho etwas dicker.
Doch mr sieht dabei au viele
kämpferisch-attraktive Spiele.
Dies Jahr hend gwonna – was gilt die Wette?
Die Kicker vom Bistro Cassette!

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Onser Welt ischd oifach riesig,
Sacha gschähet net nur hiesig.
Dosch alles ischd nicht mehr wie's war,
d' Ferien send erst spät em Jahr.
Egal wohin im Geist ich wander:
scheint's ischd alles durcheinander.
Die Marbacher Firma BPB
war en dem Jahr glei zwoimol he.
Zwoimol hat dr Schuppa brennt.
Ungläubige saget, dass es könn't koi Zufall sei,
a Gschmäckle sei do scho dabei.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

D' Bayern waret sehr frustriert,
hend d' Meisterschaft scho abonniert.
Doch gwonna hend die gfrogte Schala,
die Dortmunder Jungens aus Westfala.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

S' Geld sei ihm jo gar net wichtig,
sportlich der der FC richtig.
Andere Schwoba dät mr lünchen,
ginget se von do noch München.
Em Klinsmann ko mr's scheint's verzeiha,
was dät mr do bei andere schreia.
Dann macht's dr VfB halt selber,
mit Balakow, Bobic ond Elber.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Tennis war no nie so schnell
en Asperg drüba aktuell.
Doch net wegem „Asperg-Master“,
sondern Peter Graf's Desaster.
Für ihn gab's – was ihn sehr erbost –
net „Asperg-Open“ sondern „Asperg-closed“!
Hat en dr Hektik ganz vergessa
Steffis Geld mit Steuer zu bemessa.
Weder für „Einzel“ noch für „Doppel“
kriagt se jetzt künftig Geld von Opel.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Wo früher send Baufirmen kläglich gscheitert,
wird heut kurz a Flugbahn erweitert.
En Stuagart ging's, wenn ich's Euch sag,
ohne Probleme en sechzig Tag.
Zwischen Filderkraut ond Garta
könn't jetzt mehr Flieger starta.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Die Gräser send noch voller Tau
am Kuhdamm scho em erste Stau.

Über der Spree do liegt noch Dunst,
ond mittadren a Haufa Kunst.
Vielleicht könnet Ihr es scho ahna,
Stoff en endlos lange Bahna.
Zsammazurrt mit dicke Schnür,
abdeckt ischd Fenschdor, Dach ond Tür.
Vielleicht verhüllt der große Künstler
nach em Reichstag – s' Ulmer Münster.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Nach Hamburg ond New York hasch müssa fliega
om oi Mol a Musical zu Gsicht zu kriega.
Doch heutzutag langt Möhringen schon
wo mit Erfolg läuft „Miss Saigon“.
Möglich macht des dr Herr Deyle,
vertreibt em Schwob die Langeweile.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Nur noch mit Kat sollet mir fahra,
wo's geht Energien spara.
Dr Müll muaß jeder dohoim trenna,
net leichtsinnig Plastik ond so verbrenna.
An all des muaß dr Bürger denka,
ond Shell will s' Zeug em Meer versenka.
Do muasch dr Hass doch oifach kriega,
ond könntsch se an de Nasa ziega.
D' Franzosa send net bloß beim Strom,
die Hauptverfechter vom Atom.
Ond ladet ihre Bomba voll,
vor Mururoa beim Atoll.
Wider jeglichen Protest
hieltet sie eisern daran fest.
Für alle „sei's unschädlich gwä“,
des haschd en Hiroshima gsäh!
Greenpeace hat's zwoimol übernomma
ond isch an Ort ond Stella komma.

Hend sich net vor dr Macht verneigt,
noi, mit Protest Charakter zeigt.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Bisher beim U- ond S-Bahn fahra
isch's Gas höchstens em Nachbar aus em Hentera
gfahra.

Doch en Japan, en Tokio,
bischo en dr U-Bahn nemme froh.
A Sekte dort die hat dr Wahn,
die schlepped dort glatt Giftgas an.
Es gab Tote ond Verletzte,
weil des Gas alles benetzte.
En Sekunda bischo do kirre,
wega a paar arme Irre.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

Jed's Johr kann mr neu berichta,
ond sich ebbes z'sammadichta.
Aber s' Wetter ischd a kalts,
ond recht trocka wird's em Hals.
Drom lasset ons zom Abschied wenka,
mir müsset jetzt ebbes trenka.
Bevor em Neckor was passiert
ond s' Feuerwerk recht explodiert.

**Jo net ärgera, d' Stirn net runzla,
drüber lacha, oifach schmunzla.
Für ons zählt die paar Tage einzig,
Chor: onser Kirbe '95.**

AMEN